



名家表選序



四六之體起於六朝時則文無非四六者唐宋以來始專用其體於詔誥表箋啓而博學宏詞科則以之試士

國家設科去詞賦聲律而仍用詔誥表蓋詞賦無用而詔誥表有用也近時士子應試率多作表取中然猶嫌其麗而未則或漫而不工夫表者對君之辭所藉以道恭遜之實德忠愛之情而過爲麗句漫言以相襲母乃不可乎予謂表莫盛於唐宋唐表雄渾然有出入至於揣摩聲律剪裁典故敷陳事情語精切而意明暢則惟宋表爲然故宋人往往以四六名家我

朝所錄程表高者不減宋人其餘渾厚則有之文采則不

及也故表學至宋人不可加矣予用於校士之暇取唐宋諸名家所爲表選其尤工者抄之而充多於宋類爲八卷刻之崇正書院以與嶺海諸士子共之夫斯刻也雖似灰於敦本尚實之教導人以雕蟲篆刻爲者然科目以此取士士不工此不足以應主司況今日進取之資他日對揚之具烏可以不習乎司馬溫公自謂不能四六然亦非求工於四六者尚有金桴之集斯固無傷也

嘉靖丁未四月朔東越宛委山人陳瓘書于藥洲之宛在亭

名家表選卷之二

爲兵部尚書王峻謝副平章事表

張曲江

臣言伏奉今月二十九日制授臣兵部尚書同中書門下三品殊常寵靈妄集疲朽承恩竊喜任重惟憂臣誠歡誠恐伏以虛受之難曾史

滿盈之過夏載陳其招

填臣階緣試吏際會登朝遂得入拜尚書比天之喉舌出典方鎮爲王之爪牙雖忠烈之誠心知所竭而績用之美歲久無聞今陛下不以不能爲光爲寵寘之廟堂之上叅以軍國之謀實恐鼎足不任鵜翼爲刺退失微臣之守上累陛下之明是以永夕九飛終朝三省泉谷爲懼冰炭在懷道雖願於將行位固慙於幸得臣已有別狀具所

讓人猶蒙曲私未寢嚴命方欲俯俛恭命對揚休光磨鈇效於一割策蹇同於十駕臣誠懼塵台席謬齒國華將何以允答鴻私弼諧大化拜命祗惕罔知所爲

爲信安王獻聖真圖表

張曲江

臣言臣一昨扈從西狩岐陽時以有年事因農隙整六軍之衆脩大田之禮戍卒是訓威武載揚屬草淺馱肥霜清氣殺詔虞人以卽鹿命荊州而起鳥 陛下親御弧矢紆駕林衡曾不合圍取其背者雖有逸群之狡走險之捷而飛黃騁轡縈紉如組綵沉縱鎬死轉若神必命中於前期皆應絃而絕倒其餘變態不測神妙無窮非臣曷言所能模狀既而備獻禽之禮虔薦寢之誠教人以孝自天作則

此外效獲畢賦懿親兼禁羽騎無犯宿麥是行也典禮斯備仁恩允洽三令惟肅七德以宣魏武何階亦紀功於猛獸周文差擬將比義於非熊臣忝藉宗枝幸陪鑿輅竊觀神武冠絕古今以爲載之空言不若圖之繪事向所述聖今皆寫真雖天顏不遠而丹青莫擬徒極愚思庶好萬一謹一一陳伏深戰汗

勸封禪表

高若思

伏願褰旒寫照洽群請於帝俞闢續垂矜遂微懇於人欲騰茲璽誥激彼天波徵萬玉以警塗詔八神而弭策藉江茅而陳鄙黍飾蒼壁而奠黃琮馳萬歲以飛聲接九重而媿美使編珠毓貺開麗色於金泥觸石凝禎蕩浮華於石

感式昭昌祚永播鴻名凡在生靈義深聳踴

為齊州父老請陪封禪表

駱賓王

臣聞元天列象紫宮通北極之尊大帝凝圖玄猷暢東巡之禮是知道隆光宅既輯玉於雲臺業紹禋宗必塗金於日觀云 陛下乘乾握紀纂三統之重光御辯登樞應千齡之累聖故得河浮五老啓赤文於帝期海薦四神奉丹書於王會瑞開三脊祥洽五雲既而緝總章之舊文招辟雍之故事非煙翼較移玉輦於梁陰若月乘輪秘金繩於岱巘臣等職均芻狗陰謝桑榆幸屬堯鏡多輝照餘光於連石軒圖廣耀追盛禮於縱金然而鄒魯舊邦臨淄遺俗俱穆二周之化咸稱一變之風境接青疇俯職獲麟之

野山開翠岵斜連辯馬之峯豈可使稷山遺垞頓隔陪封之禮淹中故老獨奉告成之儀是用就日披丹仰壁輪而三舍望雲杼素叫天闕於九重儻允微誠許陪大禮則夢瓊餘息仰仙闕以相惟枕木殘魂遊岱宗而載躍

為豐國夫人慶皇太子誕表

陳伯玉

臣妾某言今日伏承軒宮載誕皇嗣克昌品物咸歡天人交慶臣妾聞聖人多子祝美於堯年螽羽宜孫稱道乎周頌自非璿圖配永寶祚靈長何以茂對天休光紹大業伏惟 皇太后陛下星虹授祉月夢延禎餘慶集於天孫榮光流於帝子玉衣方泰瑤者增輝某竊寵中姻承恩外戚塗山之慶既裕於夏臺高棟之祠未陪於殷薦竊以黃

汗之品可享王庭玄拒之微有芳天獻豈圖美於豐侈信
有厚於由衷敢用擬議頌繁精誠救藹洗心而薦竊希瑤
席之珍潔意而羞以陪金鼎之實謹獻食若干輿冒黷珍
膳沾汗象筵追用慙惶伏表悚灼

為陳御史上奉和秋景觀競渡詩表 陳伯玉

臣某言伏見某月日御製秋景務餘聊觀競渡故陳先作
式佇來篇凡六韻天文爰降品彙咸亨金簡潛開瑞圖斯
見臣聞白雲興詠漢遊汾水之祠黃竹申歌周舞瑤池之
駕然而志崇遠轍事或勞人故文思之化未光太清之道
被闕伏惟 聖母神皇陛下大虹齊聖感月含神玄德茂
於皇階文明照於天下用能提北斗挹璿衡百神景從三

靈協贊青雲出洛器用受命之符赤甲滎河終御興王之
寶非窮神之至德者其孰能與於是哉既而黃屋務閑紫
機時暇洞庭張樂思援軫於軒遊媯水披圖想同駮於堯
輦然遠而勞物者未若近而安人動而勤已者豈比靜而
泰神於是徙金躡鳴玉鸞清禁林御池殿肅波神而戒事
命舟子為水嬉彩鷁蓮歌乍起江吳之引青龍檝柱時搖
甌越之風鳥逝虬驚沸珠潭而競逐雲飛電集橫玉浦而
流光信可以娛樂性靈發輝文物皇歡允洽白日俄光於
是奏薰風於管絃詠叢雲於林籟帝歌爰作天藻攸彰黼
帳帷宮緝文房之綉綵祥雲瑞景霏翰苑之榮光信探道
於玄包得斯文於紫極太平允矣元首康哉方欲朝明堂

之宮受群后之瑞尊崇顯號光啓聖圖封玉萬丘以接千
年之統泥金少室攸增萬歲之規卓哉煌煌聖君之表也
微臣曲學蓬戶竊位蘭臺未聞駟馬之謠非有雕龍之思
鞠躬霜署謬覩于天章逖聽鈞臺側聞於帝樂天文尊貴
不遠於下臣帝寶珍崇曲宣於近貴竊以君唱臣和固不
隔於尊卑宮變商從方允諧於金石輒用齊心扣寂假翰
求詞將以攀日月之末光繼螢燭之微照

爲赤縣父老勸封禪表

陳伯玉

臣聞帝功旣又必昭告於上玄元命攸尊必升封於厚載
故七十四主能恢萬代之規二五六經以爲百王之典伏
惟陛下應天受命理紀登樞包括乾坤之靈享壽神明

之化故能開天寶闡地珍溢洛所以升圖滎河由其薦錄
群神旣替衆瑞交馳謳歌於是大歸禮樂以之咸備 陛
下以順天意允答神休垂顯號以居宸建明堂而治物百
察惟允萬國咸寧然則嵩高神宗望玉鑿而來禪天中仙
族佇金駕而崇封寔大禮之昌期膺告成之茂典况神都
爲八方之極太室居五嶽之尊 陛下垂統紫微大昌黃
運報功崇德允協神心應天順人雅符靈望皇圖盛業寔
在於茲臣等叨願堯封久忘帝力竊聞聖人封禪天下所
以會昌山嶽成功皇壽由其配永臣等旣爲 陛下赤子
陛下又爲萬姓慈親實願上報天功下順人望勒成萬嶽
大顯尊名

為建安王獻食表

陳伯玉

臣謬籍葭芋叨榮主社元戎出塞違鳳采而逾年班師入朝拜鸞閣而有日而策飭飲至頻承湛露之恩獻壽奉觴未申行潦之薦所以白茅微藉願享於鈞臺黃污菲誠思奉於瑤水謹輒獻食一百輦伏知金鷄瑞鼎盈上帝之珍羞玉女行厨盡群仙之品味以茲菲薄有陋蘋蘩多慙在藻之歡竊有獻芹之志所願皇慈俯納丹慊獲申天子萬年永慶南山之壽微臣百拜長承北極之恩

為陳舍人讓官表

陳伯玉

臣甚言伏奉今月日詔書以臣為鳳閣舍人榮命自天寵章非次祇奉惶越顛沛失圖中謝臣以諸生宦不期達徒

以時逢昭泰迹亦周行非有君子瑚璉之材通儒青紫之秀已得評刑北寺執憲南臺鷓鴣之政無聞駉馬之榮已極陛下天飛踐祚雲紀命官陽館初開庶政惟始金章玉式允恃其人如臣疲駑且所邀棄豈圖尚矜庸劣昭觀欽明任同信臣寵優時華預蒙許於詔獄叨獎溘於宸階省已循躬實知非分陛下不以榮過其量職越其才遂欲超絕親賢參掌樞要司言鳳紵推翰龍池愚臣何人敢冒天造臣聞紫機務重青瑣任隆位匪其人政由有闕臣才無經濟識昧典章將何从光贊帝猷奉揚休命物無異議政允其中臣雖小人必知不可何況乎君子豈曰能賢伏望妙選時英旁求衆議會曰惟允以弼良圖愚臣懇誠

非敢飾讓

為資州鄭使君讓官表

陳伯玉

臣某言伏奉月日制以臣為資州刺史恭承聖命祗拜寵
章匪服知慙循榮如失中謝臣學慙名術才乏器能而寶
歷逢時金章坐乘題與佐嶽無展驥之庸剖竹專城關懸
魚之化坐嘯徒積主諾空慙伏惟陛下革命開基造天
立極方且弘宣帝典大啓皇猷而四岳觀風不虛其任六
條班政允屬其才臣疲朽已侵循良久昧將何式光刺舉
允協得人伏願博選英才克諧會議使人光理政洽惟良
大周之命惟新愚臣之責攸息其所讓人具如別狀

為武奉御謝表

陳伯玉

臣某言伏奉某月日詔書以臣為尚食奉御肅恭休命祗
拜寵章榮慶既崇慙荷交集臣才虧琢玉學昧籛金徒以
席寵葭草容光日月叨承雲渥既廣天工而策惠恩昇位
非德舉無階而進坐致於青霄有慶方來載光於朱紱臣
聞瑤庭任切攸稱六尚之榮玉食禮尊寔總八珍之貴臣
術慙綠鸞業匪豢龍將何致美瓊芳和金鼎鴻私曲被
殊寵降臨天命既不可違聖恩允宜祗戴循涯揣分實所
非圖

為副大總管屯營大將軍謝表

陳伯玉

臣聞徽猷不恭周王致其大戮將軍失律漢將被其嚴刑
未有逆命驕天而通壘鼓之罰亡師沮衆遂寬載社之誅

伏惟 天冊金輪皇帝陛下肅恭 上帝子育群生萬國
所以宅心百變由其屈膝而契丹凶狡敢竊邊陲毒虐生
靈暴殄天物皇兵共伐仗仁義以共行窮寇茲回馮險阻
而猶聞臣等仁虧聖略智昧詭圖遂以熊羆之師挫於犬
羊之旅誠合結纓軍壘祗罪國章 陛下以堯舜深仁且
緩三苗之伐禹湯罪已不與萬方之辜遂得齒劍餘魂更
參授鉞之任死綏之魄復同挾纊之恩四夷義以來蘇三
軍感而抃舞瘳瘡再起佯誠是圖將士同心誓雪孟明之
耻殤魂共憤思亢杜回之忠殉義忘心報恩惟死

為建安王謝出馬表

陳伯玉

臣攸宜言伏奉 聖慈勅借臣廐馬四匹星旗方列天馬

忽來祗拜恩榮抃躍兼集臣名慙白馬陣昧青龍徒憑廟
勝之威竊總元戎之首呈師又露凶羯未孚方欲親負干
戈身先士卒金山深入期突厥之功玉壺遂臨叨得駿之
賜昔開東道今見西來感燕骨而長鳴君恩罔報向朔雲
而驪首踴頓方擒坐馳千里寔愧三軍寵貴非圖榮多增
懼

為宰相賀雪表

韓退之

臣某言臣伏以去歲冬間雨雪頗少今年春首宿麥未滋
陛下深念黎甿屢形詞旨神監昭達皇情感通春雲始繁
時雪遂降寶豐穰之嘉瑞銷厲疫於新年東作可期南畝
有望此皆 陛下與天地合德視人如傷每發聖言則獲

靈貺見天人。之相應。知朝野之同歡。臣等職在燮和。慙無效用。觀斯慶澤。實荷鴻休。

賀甘雨表

韓退之

陛下慮深稼穡。憂切烝黎。未成旱魃之虞。已積憂勤之意。密雲與綸言。繼發時雨。將天澤盈流。瑞鳥迎舟。式掩商羊之舞。蛇醫納甕。果符埜鵠之鳴。初茫灑於上宮。遂滂霈於率土。自中徂外。皆荷生成。雨及公私。靡不碩茂。野夫鼓舞。知帝力之玄通。官吏懽呼。見天心之默喻。殷后徒勤於自剪。周公空媿於舞雩。化超前聖。道貫重玄。臣某才術無聞。謬司邦甸。生成必資於帝力。進退何補於天工。沐浴太和。軒荷無極。臣之欣躍。倍萬恒情。

禮部賀冊尊號表

柳子厚

臣某伏奉月日制。陛下膺受尊號。率土臣子。慶抃無窮。

臣聞立極之大。四海無以報神功。配天之尊。萬物不能崇

聖德。唯有徽號。是彰中興。所以上探天心。下拯人欲。中謝

伏惟。元和聖文神武法天應道皇帝陛下。統承千載。光

被六幽。蠱賊盡除。福應皆集。有首有趾。咸識太平。勳臣增

爵祿之榮。戎士加賞。延之寵片。善必錄。微功盡昇。獨惟聖

謩。事絕酬答。萬國觐望。百功怨思。是以啓元和之盛典。延

昊穹之景祚。理歷疑命。寔曰聖文和衆。定功時惟神武。運

行有法天之用。變化乃應道之方。鬼神協謀。華夏同志。大

禮既建。鴻恩遂行。歡呼遠布。於九圍。滂漉普周。於八裔。慶

超邃古美冠將來臣獲守蠻荒遠承大典潢汗比陋河清
幸遂於千年塵壤均微山呼願同於萬歲

賀踐柞表

柳子厚

臣某言太子中舍嚴公弼至奉某月日勅書慰愈伏承
陛下以其月日虔奉典冊允昇

寶位凡在群生孰不慶幸臣某誠懼誠忭頓首頓首臣聞
天地泰而聖人出雷雨解而品物榮是以五行迭用木火
更其位十葉重光宗廟輔其德殷宗恭默再造成湯之業
漢文聰明克承高祖之緒

陛下重離出曜體乾繼統主鬯彰孝恭之美撫軍著神武
之功欽承遺訓永保鴻業過密之中施雨露以被物遐邇

之地觀日月之繼明則四維之外八極之表人神胥悅草
木皆春煦嫗生成不失覆載况臣謬膺藩守累受國恩爰
自出身泊乎領鎮沐浴聖澤優游昌時不獲覩闕庭之禮
展臣庶之分戴天賀

聖倍萬恒情

禮部賀立皇太子表

柳子厚

臣某等言伏奉今月日制廣陵郡王宜冊爲皇太子改名
某仍令所司擇日備禮冊命者天序有奉皇圖載寧臣某
等誠慶誠賀頓首頓首臣聞商書載以貞之文漢史傳早
建之議不惟立愛其在繼明陛下奉率前規敷揚盛典
顧茲守噐之重爰正承華之位尊義方之教載錫嘉名崇

建樹之禮武光典命以長而立自符於慎擇必子之選遂
合於至公邦本不搖王業彌固此皆宗社垂祉啓佑皇心
乾坤合謀保安聖運足以播休氣於四海洽太和於萬靈
食毛含齒所同歡慶臣等奉承制命蹈舞周行踴躍之情
倍萬恒品

禮部賀皇太子冊禮畢德音表

柳子厚

臣某等言伏奉今日制皇太子冊禮云畢思與萬方向其
惠澤者盛典斯舉鴻恩遂行凡在率土不勝抃躍臣某等
誠喜誠賀頓首頓首伏惟 皇帝陛下克奉神休以正邦
統建天下之本宗廟以安致萬國之貞兆人攸賴典冊既
備慶澤載流既廣而推恩亦好生而布德緩刑而囹圄

知感進勲而嗣續增榮崇教諭之方忠良是舉嚴贊襄之
禮賜與有加旌孝弟以厚於人倫敬鬼神而脩其祀事况
行禮之日則屏翳收跡太陽宣精用彰出震之休更表重
離之曜神化旁暢皇風遠揚自華及夷異俗同慶臣等謬
叅著定倍百恒情

代韋中丞賀元和大赦表

柳子厚

臣某言伏奉正月二日制大赦天下永貞三年宜改元和
元年太陽既昇煦育資始霈澤斯降膏潤無遺臣某誠慶
誠賀頓首頓首伏惟 皇帝陛下仁化旁流孝理弘闡紀
元示布和之令肆眚見恤人之心曠然滌瑕得以遷善渙
發大號申明舊章農有薄征市無強價勲勤是錄爵秩以

班寵寧間於幽明澤必周於夷夏近甸輕權酷之入遠人
忘水旱之災既行慶於官寮亦推恩於天屬諸生喜疊塾
之廣庶老加絮帛之優量入所以備凶興廉期於變俗爰
褒有容尊賢之典惟新載奉素王宗子之道斯在綸言一
降庶政畢行懷生之倫感悅無量臣某等守在遐遠親奉
詔條踴躍之誠倍百恒品

禮部賀冊太上皇后賀表

柳子厚

臣某等言伏奉今日詔良姊王氏冊太上皇后良媛董
氏冊太上皇德妃宜令所司備禮冊命者母儀有光坤道
克順陰教方行於萬國內理克和於六宮臣某等誠慶誠
賀頓首頓首伏惟 皇帝陛下對若天休奉揚睿旨長秋

既登其正位榆德亦被於恩光奉養見三朝之安周旋有
四星之輔豈獨配天稱大勛日爲明所以表王化之涼知
孝弟之本冠映千古儀刑四方臣某等捧戴施行踴躍無
地

禮部賀太上皇后冊畢賀表

柳子厚

臣某等言今日太上皇后冊禮云畢率土臣妾慶拜無
窮臣某等誠慶誠賀頓首頓首伏以 太上皇后著虞嬪
之至德嗣周母之徽音表率六宮明彰萬國 陛下克脩
理本以暢化源坤道知事地之方人倫識尊親之大豈惟
婦道斯備陰禮用脩其以播正始於國風致時雍於帝典
謬塵榮位獲覩盛儀踴躍之誠倍百恒品

御史臺賀嘉禾表

柳子厚

臣某言今日日宰臣以幽州所進嘉禾圖各一軸示百寮者伏以嘉穀順成靈貺昭格天人合應遐邇同風臣某誠恪誠慶頓首頓首伏惟 皇帝陛下睿謀廣運神化旁行植物知仁祥圖應聖靈嶽不愆於替祐燕谷用遂於生成豐稔既均知朔南之被澤休嘉克叶見天地之和同六穗慙稱於漢臣異歎耻書於周典自中形外均慶同歡謬忝憲司獲覩休瑞

禮部賀嘉禾及芝草表

柳子厚

臣某等言伏見今日某日內出劔南所進嘉禾圖及陝州所進紫芝草示百寮者珎圖煥開瑞彩交映遐邇偕至福

應攸同臣某等誠慶誠賀頓首頓首伏惟 皇帝陛下緝熙至道保合太和 大惟發祥地不愛寶嘉禾擢質靈草抽英獻於王庭唐叔 同穎之異薦諸郊廟班史謝連葉之奇既呈巍巍之祥更覩煌煌之秀豐年斯著聖壽用彰欽和之人歡抃無極臣優游至化披翫殊姿慶抃之誠倍萬恒品

禮部賀甘露表

柳子厚

臣某言中使王自寧至伏宣 聖旨出延和殿前丁香樹甘露一大合示宰臣未時又出一大合令明日示百寮甘露見降未止者玄化升聞靈貺昭答必呈尤異之應以告天地之和臣某誠懼誠慶頓首頓首伏惟 皇帝陛下均

煦育之功敷滲漑之澤太和潛達闕瑞克彰發於天霄特
降宮樹朝光初燭方湛湛而未晞辰景轉炎更灑灑而未
已綴葉而珠璣積耀盈器而冰玉呈姿芳襲椒蘭味兼飴
醴然則零於庭而著異紀於年以標奇徒矜往辰孰並茲
日況樹有丁香之珍殿即延和之號所以著芳風之遠播
期聖壽於無疆事絕古今慶傳遐邇臣謬承渥澤獲覩殊
祥忭躍之誠倍萬恒品

禮部賀白龍拜青蓮花合懽蓮子黃瓜等表

柳子厚

臣某言伏見今日內出滄州所進白龍見圖又出西內
定禮池中青蓮花拜神龍寺前合懽蓮子示百寮二十二
日又出鹽州所進合懽黃瓜圖者二氣交泰萬國同和動

植思協於殊祥遐邇必陳其嘉應披圖按牒聖理彰明臣
誠懽誠慶頓首頓首伏以天地非遠睿感必通疊瑞重祥
累集宮禁池蓮表異靈化非常敷彼青光徵佛書而尤絕
成其嘉實驗祥經而其稀積慶旁流自中徂外遂使龍騰
白質乘秋果應於金行瓜合黃中表聖更彰於土德遠通
邊徼近出苑園合慶同歡周於億兆況復邦畿之內雨霽
必時宿麥大穰嘉穀滋茂和風孕育靈氣陶蒸是皆發自
帝心達於天意周流升降成此歲功惠被群生自爲嘉瑞
臣深惟多幸獲遇斯時觀靈貺之備臻知人和之溥洽

禮部賀嘉瓜表

柳子厚

臣某等今日內出浙東觀察使賈全所進越州山陰縣移

風鄉百姓王獻朝園內產嘉瓜一實同蒂圖示百寮者實
祚惟新嘉瑞來應式彰聖德更表天心臣某誠慶誠賀頓
首頓首伏惟 皇帝陛下保合太和緝熙庶類德馨上達
神化旁行嘉瓜發祥來自侯服質惟同蒂見車書之永均
地則移風知化育之方始雖七月而食豳土歌王業之難
五色稱瓊東陵詠佳賓之會未聞感通若茲昭著也臣某
遭逢聖運親仰瓊圖忭躍之誠倍百恒品

爲王京兆賀嘉蓮表

柳子厚

臣某言人百某時中使其奉宣 聖旨出西內神龍寺前
水渠內合懽蓮花圖一軸示百寮者祥圖煥開異彩交映
贊天地之合德神人以同歡臣某誠歡誠慶頓首頓首伏

惟 皇帝陛下道協重華慶傳種德陶陰陽之粹美孕造
化之精英吉慶每見於天心發祥必自於禁掖是使雙華
擢秀連蒂垂芳香激大王之風影耀天泉之水煥開宮沼
旁映給園靈貺應期天龍護聖寶曆慶起於小劫神功允
洽於大千臣某獲覩昇平濫居榮寵聞瑞應而稱慶仰績
事而增歡

王京兆賀雨表三

柳子厚

臣某言今月十三日回奉進旨緣自春來少雨宜即差官
精誠祈禱者十四日臣便差官分赴靈跡其日雲陰四合
至十五日甘雨遂降伏惟 皇帝陛下言爲神化動合天
心未成旱暵之虞已積憂勤之慮衆靈受職蒼蔚且躋於

南山百穀仰榮滂霽遂霽於東作睿暮朝降膏澤夕周知
天人之已交識陰陽之不測然則周王徒勤於方社殷帝
虛美於桑林豈若無災而早圖未禱而先應化超前聖道
貫重玄徧野同歡傾都相慶臣之欣躍倍萬恒情

王京北賀雨表四

柳子厚

臣某言臣於三月二十九日奉進旨於諸靈跡處祈雨至
三十日甘雨遂降者臣聞惟聖有作先天不違發令而祥
風已興致誠而玄液旋被臣某誠欣誠賀頓首頓首伏惟
皇帝陛下側身防患道邁周王盡力勤人功超夏后聖謨
廣運驅百靈以從風神化旁行滋五稼而流澤油雲四合
膏雨溥周農壤遂一於肥饒滲漑盡霑於遐邇蒸黎詠德

知必自於聖心草木欣榮如有感於皇化有年之慶實在
於斯臣以無能謬領京邑上勞宸慮運此歲功

爲裴中丞賀克東車赦表

柳子厚

臣某言伏奉月日德音以滌青蕩平褒功宥罪布告遐邇
者臣聞肅殺之後每致陽和雷霆既施必聞膏澤伏惟
陛下體乾剛以運行叶坤元之翕闢百靈受職六合從風
阻兵怙亂者必就梟擒懷忠抱義者無不甄錄激其效順
特加旌節之榮寵以元功遂兼鼎鉉之任戎行窮賞養之
重死事極褒恤之憂劫脅之役盡除聚斂之名皆去傷痍
受煦老疾加恩豐財已復其征徭賜種更盈於種稔嚴山
川之祀神必有依申義烈之家物無不感周王推忠厚之

化漢帝慙愷悌之風太平之德斯為至盛然則虞巡可復
告成將慶於岱宗漢典方興講禮再榮於闕里臣謬膺重
寄獲覩太平忭蹈之誠倍萬恒品謹已施行郡邑宣示軍
戎莫不動地歡呼若醉千鍾之酒騰天鼓舞如聞九奏之
音

柳州賀破東平表

柳子厚

臣某言即日被觀察使牒李師道以月日克就梟戮者帝
德廣運唐命惟新靈贖廓清天地貞觀率土臣庶慶忭無
涯伏惟睿文聖武皇帝陛下威使百神德消六沴天降
寶運時歸太平自克夏擒吳翦蜀平蔡殊類稽顙群疑革
心唯此兇妖尚聞悖慢公議既得廟謀必臧旌旗燭耀於

洪河金鼓震驚於靈嶽郟城自清寧同苕魯之爭齊地悉
平無俟耿陳之戰五兵永戢七德無虧含生比堯舜之仁
率土陋成康之俗介在霧息已望翠華之來沂水風生更
起舞雩之詠千歲之統實在於斯臣守在蠻荒獲承大慶
忭躍之至倍萬常情

代裴中丞賀分淄青為二道節度表 柳子厚

臣某言伏見某月日制分淄青諸州為二道節度都團練
觀察等使者蛇豕之穴忽為樂郊氛沴之餘盡成和氣伏
惟皇帝陛下天付昌期神開寶曆復昇平之土宇拔妖
孽之根源自西自東不違於指顧我疆我理咸得其區分
山川備臨制之形道塗摘征徭之便俾侯既定賜履以寧

異青充之封爰從古制解曹衛之地實契雅謀車甲永藏
馬牛勿用俗被雍熙之化代知仁壽之期農事載盛於耨
芟儒風重興於俎豆足使季札觀魯更陳南籥之儀山甫
徂齊復正東方之賦臣總戎遠地不獲陪賀闕庭

爲樊左丞讓官表

柳子厚

臣某言伏奉今月二十八日制除臣尚書左丞寵命俯臨
慙顏自失泛大鯨之海自覺魂搖載巨鼈之山未知恩重
臣聞尚書百揆翊亮萬機故天上尊北斗中樞陛下有
南宮左轄晉昇孔坦諒且當時漢拜揚喬閑練故事庶得
百寮有憚於會府諸侯取法於京師臣實謏才謬登清貫
握蘭起草昔茶朝經剖竹頒條近貽人瘼備歷中外無間

嚴彩版圖載緝貢賦未忘於九州銅印更操威儀不檢於
三署次郎補闕豈易其八聖主求才宜難此受切謂旁求
俊乂側訪瓌奇必使德人準繩言成綱紀興化致理時無
間言況安上必在於薦賢危身莫踰於曠職倘蒙垂受紫
渙俯矜丹誠愚臣保陳力之言聖鑒有責成之地無任靦
冒惶悚之極謹指朝堂奉表陳讓以聞

代裴中丞謝討黃少卿賊表

柳子厚

臣某云即日奉事官米蘭迴伏奉手詔云云者臣聞虜革
既平雖疥癬而必去豺狼已斃在狐鼠而宜除臣某伏惟
元和聖文神武法天應道皇帝陛下受命上玄底寧下土
兇渠盡滅威武載揚蠢爾腥膻尚聞凌蒙靈旗斜指銅獸

俯臨三軍。知必勝之方。萬姓喜永清之路。微臣忝司戎律。親列顏行。攝伏波之舊規。乘下瀨之故事。盡瘁事國。期畢命於戈矛。不宿於家。思奮身於原野。即以今日某時出師。就道便披榛蹶石。摩壘陷堅。蕩清海隅。永息邊徼。竊以才非充國。敢自贊於無踰志。堅孟公庶追蹤於不伐。謬承重委。寤寐含惶。

爲崔中丞請朝覲表

柳子厚

臣歷刺三州。連總二府。外任逾紀。人覲無階。就日望雲。魂飛心注。伏惟睿聖文武皇帝陛下。覆載無私。遐邇同致。復昇平之故事。繼前聖之高蹤。中外踐更。出入迭用。臣以虛薄。叨受恩榮。徒竭夙夜之心。未申朝夕之敬。天威咫尺。

誠寤寐而無違。雲漢昭回。固瞻仰而何及。是以前在朗寧。封章累上。及移林桂。星紀屢周。微衷尚隔於戴盆。積望徒懸於窺管。葵藿之誠。彌切大馬之戀。逾深人欲天從於茲。未驗下情。上達終冀。不誣敢瀆。宸嚴聲陳。丹懇伏乞。賜臣除替許至闕庭。則蹈舞於群寮。備班行於散地。足趨中禁。目覩大明。俾成九族之祭。以盡百生之幸。非敢竊國。賔五獻之禮。希康侯三接之恩。一覲龍顏。萬死爲足。

柳州謝上表

柳子厚

臣某言。伏奉詔書。授臣柳州刺史。以今月二日至郡。上訖。臣前歲以久停官秩。去年蒙聖恩除替。便欲裂裳裹足。趨赴京師。以舊疾所嬰。彌年未愈。建及今夏始就歸途。襄

陽節度使于頔與臣早歲同官見臣當暑者在道懇留館
尋假職名意欲厚臣非臣所願伏惟 陛下光被之德道
以洽於區中憂濟之勤心每徧於天下嘗以萬邦共理必
藉於循良一物不遺尚延於愚藐假臣寵渥重領方州駑
駘復效於奔馳枯朽更同於華秀臣聞潢汙易竭抑有朝
宗之願犬馬無識猶知戀主之誠揣分則然惟天知鑒況
臣昔因左官一紀於外子牟馳心於魏闕汲黯積思於漢
庭豈非夫人獨無斯戀去就者榮辱之主朝廷者仕進之
源臣子之宜忠貞所志臣維心同犬馬而分比潢汙幸躡
康衢意非往蹇臣之此誠口不能喻意欲悉達文非盡言
此臣所以自外自恨復乖志願猶冀苦心勵節上奉詔條

憲寡恤貧下除人瘼恭宣皇化少答鴻私

奉薦從事表

柳子厚

某績茂戎軒才優管記操刀必割豈謝剗犀落筆不休寧
慙倚馬况早登科選夙洽時譚匪惟詞藝雙美抑亦器能
多適比於流輩頗爲滯淹輒敢薦陳伏希獎錄

爲武中丞謝賜櫻桃表

柳子厚

臣某言中使某乙至奉宣 聖旨賜臣櫻桃若干者天捲
特深時珍游降寵驚里巷恩溢方圓臣誠喜誠懼頓首頓
首伏以含桃之羞時令攸貴况今採因御苑分自天厨使
發九霄集繁星而積耀味調六氣承湛露而不晞盈貲而
外被恩光適口而中含渥澤顧慙素食彌切自公豈徒若

子所先遂馱小人之腹

爲裴中丞賀破東平表

柳子厚

臣某言月日得進奏官狀報逆賊李師道以某月日克就
梟戮率土臣子慶抃無涯臣聞負恩干紀者鬼得而誅犯
順窮凶者天奪其魄不息妖孽曷彰聖功伏惟陛下先
天不違與神合契掩周宣中興之業陋漢光再造之勳靈
旗四臨氛沴皆散凡在臣庶盡覩昇平伏以師道席父祖
以作威苞海岳而專祿恃東秦十二之險誘臨淄三七之
兵竊據一方歲踰五紀朝宗之地曠若外區封祀之山隔
成異域累聖垂德曾未悛心餘孽滔天果聞折首遂使云
亭有主知王牒之將封遼海無虞見石罅之已至此皆

陛下神籌獨得廟畧無遺授任推盡力之誠縱舍有感心
之化金石可貫龜筮必從克成不戰之功遂洽無爲之理
臣謬司戎旅遠守方隅愧無橫槊之功坐見覆盆之秦抃
蹈歡慶倍萬恒情

子所先遂馱小人之腹

為裴中丞賀破東平表

柳子厚

臣某言月日得進奏官狀報逆賊李師道以某月日克就
梟戮率土臣子慶抃無涯臣聞負恩干紀者鬼得而誅犯
順窮凶者天奪其魄不息妖孽曷彰聖功伏惟陛下先
天不違與神合契掩周宣中興之業陋漢光再造之勳靈
旗四臨氛沴皆散凡在臣庶盡覩昇平伏以師道席父祖
以作威苞海岳而專祿恃東秦十二之險誘臨淄三七之
兵竊據一方歲踰五紀朝宗之地曠若外區封祀之山隔
成異域累聖垂德曾未悛心餘孽滔天果聞折首遂使云
亭有主知玉牒之將封遼海無虞見石罅之已至此皆

陛下神籌獨得廟畧無遺授任推盡力之誠縱舍有感心
之化金石可貫龜筮必從克成不戰之功遂洽無為之理
臣謬司戎旅遠守方隅愧無橫槩之功坐見覆盆之秦抃
蹈歡慶倍萬恒情

Table with 15 columns and 1 row, containing faint text. The text is illegible due to low contrast and bleed-through.

--	--	--	--	--	--	--	--	--	--	--	--	--	--	--

Fragment of handwritten text on the right edge of the table area.

Fragment of handwritten text at the bottom right of the page.

